

REPUBLIKA E KOSOVËS - REPUBLIKA KOSOVA - REPUBLIC OF KOSOVO SHËRBIMI SPITALOR DHE KLINIK UNIVERSITAR I KOSOVËS - UNIVERSITETSKA BOLNIČKA I KLINIČKE SLUŽBE KOSOVA - THE HOSPITAL AND UNIVERSITY CLINICAL SERVICE OF KOSOVO	
ARKIVI QENDROR - CENTRALNI ARHIV - CENTRAL ARCHIVE	
Nr. i njesis org org. jed org. unit	Nr. Prot. Broj. prot. 1464/5 Prot. no.
Nr. i faq. Br. str. -7- No. page	Data Datum 08-10-19 Date
PRISTINE - PRISTINA - PRISTINA	



Republika e Kosovës
Republika Kosova – Republic of Kosovo
Shërbimi Spitalor dhe Klinik Universitar i Kosovës - Univerzitetska Bolnička i Klinička
Služba Kosova - Hospital and University Clinical Service of Kosovo

RREGULLORE PËR PËRCAKTIMIN E KUSHTEVE DHE
ORGANIZIMIN E PRAKTIKES KLINIKE DHE USHTRIMEVE PËR
STUDENTËT E INSTITUCIONEVE PRIVATE TË ARSIMIT TË LARTË
NË SHËRBIMIN SPITALOR DHE KLINIK UNIVERSITAR TË KOSOVËS.

Qershor, 2019

Në bazë të nenit 45 paragrafi 3 të Ligjit Nr.04/L-125 Për Shëndetësi dhe në mbështetje të nenit 12 të Statutit të Shërbimit Spitalor dhe Klinik Universitar të Kosovës (SHSKUK), Bordi Drejtues i Shërbimit Spitalor dhe Klinik Universitar të Kosovës (SHSKUK), në mbledhjen e mbajtur më 09/10/2019 miraton këtë:

RREGULLORE NR:___ PËR PËRCAKTIMIN E KUSHTEVE DHE ORGANIZIMIN E PRAKTIKES KLINIKE DHE USHTRIMEVE PËR STUDENTËT E INSTITUCIONEVE PRIVATE TË ARSIMIT TË LARTË NË SHËRBIMIN SPITALOR DHE KLINIK UNIVERSITAR TË KOSOVËS.

Neni 1

Qëllimi

Qëllimi i kësaj rregullore është që të përcaktojë formën dhe procedurën për realizimin e praktikës klinike dhe ushtrimeve në njësitë përbërëse të Shërbimit Spitalor dhe Klinik Universitar të Kosovës sipas statutit.

Neni 2

Fushëveprimi

Me këtë rregullore rregullohen kushtet për organizimin e praktikës klinike dhe të ushtrimeve për studentët e Institucioneve private të Arsimit të Lartë në Shërbimin Spitalor dhe Klinik Universitar të Kosovës.

Neni 3

Përkufizime

1. Shprehjet e përdorura në këtë rregullore kanë këtë kuptim:

1.1.Statuti – Statuti i Shërbimit Spitalor dhe Klinik Universitar i Kosovës;

1.2.Institucion privat i Arsimit të lartë – Çdo institucion privat i arsimit të lartë i licencuar dhe i akredituar sipas legjislacionit në Republikën e Kosovës;

1.3.Njësitë përbërëse të Shërbimit Spitalor dhe Klinik Universitar të Kosovës – Njësitë përbërëse të Shërbimit Spitalor dhe Klinik Universitar sipas statutit;

1.4.Personi përgjegjës për koordinimin e praktikës klinike dhe ushtrimeve – Personi që ka për kompetencë koordinimin dhe mbikëqyrjen e organizimit të praktikës klinike dhe ushtrimeve;

1.5.Mentori klinik – Personi që mbikëqyr dhe mentoron studentët gjatë organizimit të praktikës klinike.

Neni 4

Praktika klinike dhe ushtrimet në Shërbimin Spitalor dhe Klinik Universitar të Kosovës

1. Shërbimi Spitalor dhe Klinik Universitar i Kosovës mundëson realizimin e praktikës klinike dhe ushtrimeve për të gjithë studentët e institucioneve private të arsimit të lartë të licencuara dhe të akredituara sipas legjislacionit në Republikën e Kosovës.
2. Praktika klinike dhe ushtrimet sipas paragrafi 1 të këtij neni organizohen dhe realizohen në të gjitha njësitë përbërëse të Shërbimit Spitalor dhe Klinik Universitar të Kosovës.
3. Praktika klinike dhe ushtrimet sipas këtij neni realizohet në harmoni me planin e punës të njësisë përkatëse në kuadër të Shërbimit Spitalor dhe Klinik Universitar të Kosovës.

Neni 5

Përgjegjësitë e Shërbimit Spitalor dhe Klinik Universitar të Kosovës

1. Shërbimi Spitalor dhe Klinik Universitar i Kosovës ofron kushtet e nevojshme që mundësojnë realizimin e praktikës klinike dhe ushtrimeve sipas kësaj rregullore.
2. Drejtori i Përgjithshëm i Shërbimit Spitalor dhe Klinik Universitar i Kosovës në bashkëpunim me Drejtorin për Arsim dhe Shkencë të Shërbimit Spitalor dhe Klinik Universitar të Kosovës caktojnë personin përgjegjës për koordinimin dhe mbikëqyrjen e realizimit të praktikës klinike dhe ushtrimeve.
3. Shërbimi Spitalor dhe Klinik Universitar i Kosovës, lëshon vërtetim për kryerjen e praktikës klinike dhe ushtrimeve për studentin/en që ka përfunduar me rregull praktiken klinike përkatësisht ushtrimet në Shërbimin Spitalor dhe Klinik Universitar i Kosovës.

Neni 6

Mentorët klinik

1. Mentorët klinik që angazhohen në pajtim me këtë rregullore duhet që të jenë në mardhënie pune me Shërbimin Spitalor dhe Klinik Universitar të Kosovës.
2. Drejtori për Arsim dhe Shkencë i Shërbimit Spitalor dhe Klinik Universitar të Kosovës emëron mentorët klinik në pajtim me këtë rregullore dhe aktet tjera në fuqi.
3. Emërimi i mentorëve bëhet tridhjetë (30) ditë para fillimit të praktikës klinike përkatësisht ushtrimeve.
4. Institucioni Privat i Arsimit të Lartë ka obligim që të paguajë secilin mentor klinik në përputhje me orët e angazhimit.
5. Pagesa sipas paragrafit 4 të këtij neni duhet të bëhet sipas dispozitave ligjore në fuqi.

Neni 7

Organizimi i praktikës klinike dhe ushtrimeve

1. Institucionet private të arsimit të lartë nga neni 4 paragrafi 1 i kësaj rregullore lidhin marrëveshje me Shërbimin Spitalor dhe Klinik Universitar të Kosovës për mbajtjen dhe organizimin e praktikës klinike dhe ushtrimeve.
2. Numri i studentëve që kryejnë praktikë klinike dhe ushtrime në Shërbimin Spitalor dhe Klinik Universitar të Kosovës përcaktohet me vendimin përkatës të Agjencionit Kosovë për Akreditim.
3. Praktika klinike dhe ushtrimet në Shërbimin Spitalor dhe Klinik Universitar organizohen pas përfundimit të orarit të rregullt të punës në Shërbimin Spitalor dhe Klinik Universitar të Kosovës (07:00-15:00).

4. Praktika klinike dhe ushtrimet në Shërbimin Spitalor dhe Klinik Universitar të Kosovës mund të organizohen çdo ditë duke filluar nga 15:00 deri në 20:00.

Neni 8

Përgjegjësitë e Institucioneve private të arsimit të lartë

1. Bartësit e institucioneve private të arsimit të lartë hartojnë listën e studentëve që do të zhvillojnë praktiken klinike dhe ushtrimet në Shërbimin Spitalor dhe Klinik Universitar të Kosovës.
2. Studentët janë të obliguar që të vijnë me rregull praktiken klinike dhe ushtrimet sipas planit të punës së njësisë përkatëse të Shërbimit Spitalor dhe Klinik Universitar të Kosovës.
3. Studentët e Institucioneve private të arsimit të lartë, në rast se me qëllim ose nga pakujdesia shkaktojnë dëm Shërbimit Spitalor dhe Klinik Universitar të Kosovës, atëherë institucioni privat përkatës është i obliguar që të kompensojë shumën e dëmit të shkaktuar në tërësi.

Neni 9

Kushtet e veçanta për realizimin e praktikës klinike dhe ushtrimeve në Shërbimin Spitalor dhe Klinik Universitar të Kosovës

1. Praktika klinike dhe ushtrimet për studentët e institucioneve private të arsimit të lartë në Shërbimin Spitalor dhe Klinik Universitar të Kosovës organizohet me pagesë.
2. Pagesa nga paragrafi 1 i këtij neni realizohet si kompensim për shërbimet profesionale të marrura në Shërbimin Spitalor dhe Klinik Universitar të Kosovës dhe për mentorim.
3. Pagesa sipas këtij neni realizohet në llogari të Shërbimit Spitalor dhe Klinik Universitar të Kosovës dhe kategorizohet sipas fushës së studimeve.
4. Studentët e institucioneve private të arsimit të lartë gjatë kryerjes së praktikës klinike dhe ushtrimeve janë të obliguar që të kenë me vete uniformën me logon e institucionit përkatës të tyre.
5. Për studentët e drejtimit të infermierisë, mami, fizioterapi, logopedi, laborant, psikologji dhe radiologji të cilët kryejnë praktikë klinike në Shërbimin Spitalor dhe Klinik Universitar të Kosovës, Institucioni Privat i Arsimit të Lartë duhet ti paguajë Shërbimit Spitalor dhe Klinik Universitar të Kosovës shumën prej njëqindpesëdhjetë (150) euro për një (1) student për një (1) vit akademik.
6. Për studentët e drejtimit stomatologji të cilët kryejnë ushtrime dhe praktike në Shërbimin Spitalor dhe Klinik Universitar të Kosovës, Institucioni Privat i Arsimit të Lartë duhet ti paguajë Shërbimit Spitalor dhe Klinik Universitar të Kosovës shumën prej njëmijëpesqind (1500) euro për një (1) student për një (1) vit akademik.

7. Për studentët e drejtimit të farmacistë të cilët kryejnë ushtrime dhe praktike në Shërbimin Spitalor dhe Klinik Universitar të Kosovës, Institucioni Privat i Arsimit të Lartë duhet ti paguajë Shërbimit Spitalor dhe Klinik Universitar të Kosovës shumën prej katërqind (400) euro për një (1) student për një (1) vit akademik.
8. Pagesa sipas këtij neni duhet të realizohet para fillimit të mbajtjes së praktikës klinike përkatësisht ushtrimeve.

Neni 10 **Sanksionet**

1. Çdo veprim në kundërshtim me dispozitat e kësaj rregullore konsiderohet shkelje dhe sanksionohet me aktet e brendshme të Shërbimit Spitalor dhe Klinik Universitar të Kosovës.
2. Personat përgjegjës nga Shërbimi Spitalor dhe Klinik Universitar i Kosovës si dhe studentët që kryejnë praktikë klinike dhe ushtrime në Shërbimin Spitalor duhet të ushtrojnë veprimtarinë e tyre në pajtim me Kodin Etik dhe Deontologjinë Mjekësore dhe ligjet në fuqi.

Neni 11 **Mbikëqyrja**

1. Autoritet mbikqyrës i zbatimit të kësaj rregullore janë:
 - 1.1 Në Qendrën Klinike Universitare të Kosovës Drejtori për Arsim dhe Shkencë i Shërbimit Spitalor dhe Klinik Universitar të Kosovës, Drejtori i Klinikës dhe Drejtori i Infermierisë në Shërbimin Spitalor dhe Klinik Universitar të Kosovës.
 - 1.2 Në Spitalet Rajonale Drejtori Mjekësor dhe Drejtori i Infermierisë.
 - 1.3 Në njësitë tjera të Shërbimit Spitalor dhe Klinik Universitar të Kosovës, që nuk janë përmendur në nënparagrafin 1.1 dhe 1.2 të këtij neni, autoritet mbikëqyrës është Drejtori i njësisë.
 - 1.4 Personi përgjegjës sipas paragrafit 2 të nenit 5 të kësaj rregullore.

Neni 12 **Dispozitat shfuqizuese**

Dispozitat e kësaj rregulloreje shfuqizojnë çdo marrëveshje të lidhur para miratimit të kësaj rregullore dhe çdo marrëveshje tjetër në kundërshtim me këtë rregullore.

Neni 13

Hyrja në fuqi

Kjo rregullore hyn në fuqi tridhjetë (30) ditë pas miratimit nga ana e Bordit Drejtues të Shërbimit Spitalor dhe Klinik Universitar të Kosovës.



Prof. Dr. Naser Ramadani

Kryesues i Bordit Drejtues të SHSKUK.